



Curdin Lansel, Giuseppe Giuanin Decurtins e Clau Scherrer (da schn.) sülla Piazza Somvih, üna da las piazzas da Zuoz ingio chi gnarà chantà in lügl 2022.

FOTOS FLURIN ANDRY



Il comité d'organisaziun dal festival a Zuoz cun Jachen Prevost (schn.), Curdin Lansel ed Arno Felix.

FOTOS FLURIN ANDRY

ENGIADINA BASSA

Musica classica in lös particulars

Il Quartet Stradivari riva darcheu in Engiadina Bassa. Lur concerts preschaintan els in lös particulars ed istorics, tanter oter eir i'l Chastè da Tarasp. Daspö lur debüt da l'on 2007 tocca il Quartet Stradivari pro'ls cuntschaints ensembles da musica a corda da la Svizra. Cun lur turneas visitan la musicanta e'ls musicants tuot il muond. Uschè han els concertà tanter oter illa Wigmore Hall a Londra, i'l Metropolitan Museum a New York, illa Filarmonia da Berlin o illa Kioi Hall Tokyo. Il quartet vain eir adüna invidà a renomnats festivals sco il Lucerne Festival o a quel da Rheingau. L'intent da lur agen festival es da preschaintar lur musica culs instrumaints da corda adüna in lös particulars, saja quai stabilimaints istorics, baselgias o eir in chastels.

Musica ed inscuters

Intant tocca la festa da Stradivari a Scuol pro'l program da turneas e festivals dal Quartet Stradivari. Sper il giodimaint musical spordschan els davo mincha concert ün aperitiv ingio chi's survain la pussibilità da gnir in contact culs musicists. Plünavant as poja partecipar a la tschaina d'artists ed as dedicar e filosofar insemel culs artists davart la cuschina indigena.

Il Quartet Stradivari cumainza in lündeschi, ils 11 october sia seria da concerts a Scuol e cuntourns i'l Chastè da Tarasp cun ün viadi tras l'istorgia da Schubert. Mardi saira preschaintan Maja Weber e Clemens Weigel illa baselgia da Lavin ouvras per duos violoncellos. Insemel cun Sebastian Bobren, violina, e Benjamin Engeli, clavazin, suna Maja Weber in marcurdi saira illa baselgia da Sent ouvras da Haydn e Brahms. L'ultim concert da la seria es in gövgia, ils 14 d'october, e quel maina als amatur da la musica classica illa baselgia da Scuol. Da dudir sun quella saira trios da clarinetta da Beethoven e da Brahms. Il clarinettist Fabio di Càsola vain accumpagnà da Benjamin Engeli al clavazin e da Maja Weber al violoncello. (fmr/afi)

Reservaziuns e program sün www.stradivarifest.com o lura pro'l büro d'infurmaziun dal Turissem Engiadina Scuol Zernez a Scuol.

LA PUNT CHAMUES-CH

Onur per l'Ova Chamuera

Scu seguonda vschinauncha insomma, zieva Bever pel flüm Beverin, survegn eir La Punt Chamues-ch il label «Perla d'ova PLUS». La vschinauncha vegn undreda per l'Ova Chamuera. Quella es pü u main schinageda cumplettamaing d'intervenziuns da l'umaun. «Cul tschertificat Perla d'ova PLUS vegn onuro ün flüm unic ed intact in Engiadina Scuol. «Ota e protet eir in avegnir», ha dit Jakob Stieger, il president cumünel da La Punt Chamues-ch, «tuot quels chi vaun a visiter la Val Chamuera saron impreschiunos da la bellezza da l'Ova Chamuera.» L'uniun Perla d'ova PLUS ho l'intenziun da surder eir ad otras ovas p.ex. i'l chantun Berna u i'l Vallais, lur label. La premissa es cha las ovas sajan da granda valur ecologica. (cdm/fmr)

52 cumposiziuns novas per Zuoz

In lügl 2022 ha lö a Zuoz il seguond Festival da la chanzun rumantscha. A chaschun da la radunanza generala da l'uniun «La chanzun rumantscha» sun gnüdas surdattas las cumposiziuns tschernüdas.

FLURIN ANDRY/FMR

Da l'on 2016 han Giuseppe Giuanin Decurtins, Clau Scherrer e Flavia Walder fundà l'uniun «La chanzun rumantscha». Actualmaing ha quella 144 commembras e commembers. Mincha trais ons prevezza l'uniun d'organisar adüna in-clur oter festivals da la chanzun rumantscha. Il prüm es stat dal 2019 a Trun, il prossem sarà dals prüms fin als 3 da lügl 2022 a Zuoz. Dal comité d'organisaziun da quist festival fan part il president Curdin Lansel e'ls commembers Arno Felix, finanzas e Jachen Prevost, comunicaziun. In venderdi ha salvà l'uniun presidiada da Clau Scherrer a Zuoz sia seguonda radunanza generala.

Texts da poetessas e poets da tuot la Rumantschia

Ün element important dal Festival da la chanzun rumantscha es la concorrenza da cumposiziuns: Tuot las personas chi cumponan d'airan invidadas dad inoltrar lur cumposiziuns pella festa a Zuoz. Giuseppe Giuanin Decurtins, il coordinatur da la concorrenza, ha orientà davart la partecipaziun da cumponistas e cumponists na be rumantschs: «Pel prüm festival a Trun d'airan gnüdas inoltradas 35 chanzuns, quista jada esa perfin 52 cumposiziuns.» 13 chanzuns sun per cors d'uffants, 23 chanzuns

per cor masdà, 13 per cor viril e 3 per cor da duonnas. Quellas nu sun amo in concorrenza. Pellas chanzuns han ils cumponists tschernü texts da differentas auturas ed autoors rumantschs. «La giuria consista da trais personas independentas chi sun svesta musicists, dirigents e cumponists. Da las trais categorias ha la

tschernü e rangà quatter chanzuns», ha declerà il responsabel pella concorrenza. El ha surdat las 12 chanzuns a Curdin Lansel: «Uossa pon ils cors as metter a la lavur e's preparar pel festival a Zuoz.»

Cun l'acconsentimaint da las cumponistas e collegas

Las tractandas statuaras ha evas la radunanza generala in möd speditiv e sainza cuntravuschs. La chaschiera Iris Cadalbert ha preschantà il quint. L'agen chapital s'amunta a s-chars 19 300 francs. In connex cul program da lavur ha il president Clau Scherrer dit chi saja previs da publicar las 52 cumposiziuns novas subit davo la concorrenza dal festival 2022 per ün on sülla pagina d'internet chanzunrumantscha.ch, «scha'ls cumponists sun perinclets.» Quellas dessan pudair gnir telechargiadas gratuitaing da chi chi ha interess. «Davo quel on guardaina insemel culs cumponists ingio tillas metter in salv, p.ex. in üna biblioteca virtuala», ha'l agiunt. La suprananza guardarà eir da tscherchar il lö pel festival 2025. «Ingio cha'l terz Festival da la chanzun rumantscha gnarà realisà comunicaran a la fin dal festival 2022 a Zuoz.» Sco cha Arno Felix ha infuormà s'amuntaran ils cuosts pel festival a Zuoz a 100 000 francs: «90 000 francs ed üna garanzia da deficit vaina fingià.»

Eir psalms da Sweelinck

Curdin Lansel ha preschantà il program dal festival 2022 a Zuoz: «L'inscunter da visitaduors, chantaduors ed artists sarà central a Zuoz», ha'l declerà, «chant e musica daraja süllas plü bellas piazzas da cumün, ils concerts da cor e la concorrenza saran illa baselgia San Luzi.» I'l Globe Lyceum sarà in sonda saira la not dals chantaduors cun Gianni Tschennet da Schlarigna, Chiara Jacomet da Rabius, las bands Prefix da Zuoz e Ganes da las Dolomitas. «L'ensemble vocal Lama-raviglia chanterà psalms da Jan Pieterszonn Sweelinck chi'd es mort dal 1621», ha dit Curdin Lansel, «da quellas melodias sun rivadas i'l 18avel secul eir a Zuoz, d'ürant il festival varà il public interessà l'ocasiun da verer illa Tuor Planta unicats dal cumponist ollandais Sweelinck.»

Agricoltura e prodots indigens d'ota qualità

L'ultima fin d'eivna ha gnü lö l'exposiziun e'l marchà agricul dal Grischun dal süd pro'l Chastè Planta-Wildenberg a Zernez. Illa giassa sur il prà d'eira marchà cun var 40 stands e prodots da tuot gener.

BENEDICT STECHER/FMR

L'exposiziun e'l marchà dal Grischun dal süd a Zernez es gnü organisà quist on da las societats da paurs d'Engiadina, Val Müstair e valladas dal süd. Sco cha'l president d'organisaziun da la festa Duosch Städler ha dit, es l'exposiziun cun marchà cumbinada cun blera lavur. «Avant duos ons vaina organisà l'ultima exposiziun cun marchà. Normalmaing vaina minch'on la

festa agricula a Zernez, ma il coronavirus ha fat l'on passà ün strich tras il quint.» Sco cha Städler ha continuà es l'organisaziun fich pitschna, quai chi diminuischa eir ils cuosts da l'evenimaint. «Il cumün da Zernez sustegna a no impustüt eir cun lavur e roba e material chi's douvra per uschè ün'exposiziun e marchà.» El d'eira preschaint eir sco rapreschantant dal cumün da Zernez ed a Fabian Schorta, responsabel pel turissem ed arrandschamaints su-

ottastaiva l'organisaziun dal marchà. Implü d'eira da la partida eir Gianna Martina Peer da Ramosch chi s'ha occupada da l'organisaziun dal muvel, eir sco cusgliadra agricula da professiun.

Bleras agüdantas ed agüdants

Per furtüna dispuona l'organisaziun da bleras agüdantas ed agüdants chi contribuischan gronda lavur per ün evenimaint ed inscunter tradiziunal d'ota qualità. Sper l'exposiziun d'eira organisà illa giassa sura ün marchà cun var 40 stands cun prodots indigens e paurlis chi han muossà la gronda schelta da prodots da la regiun. «No tramettain ad exposituors chi sun stats i'ls ons avant al marchà ün invid e quels s'annunzchan. Per stands pitschens pajna 30 francs, mezdans 50 francs e gronds 70 francs.» Pel solit sun quai tenor el adüna ils istess exposituors. «Minch'event dà a no ingon dapli lavur dapli causa il coronavirus», ha infuorma Schorta. La festa ha gnü lö cun bell'ora ed ha attrat blers visitaduors chi s'han pudü atschertar cha l'agricultura illas regiuns es sana, activa ed averta per novums. Na be la festa a Zernez, ma eir ils cumüns da las regiuns han muossà ün purter uni chi'd es pussibel be culla gronda lavur d'ün'agricultura sana.

Exposiziun cun diversas razzas da bes-chas

A l'exposiziun sun gnüdas preschantadas diversas razzas da muvel, bescha e chavals. Ün simil travasch dà eir fom e said e perquai ha la Società da paurs Engiadina Bassa organisà üna restoraziun cun bancs e maisas e cun damangiar e dabaiver. Sco visitaduor s'haja svelto gnü il sentimaint dad esser üna part d'üna famiglia gronda chi pissera cha

l'agricultura haja üna ferma piazza e sustegna cun lur lavur la sporta turistica illa regiun. La glieud as cugnuoscha ed ils inscuters sun amicabels e simpatics. L'exposiziun e marchà agricul dal Grischun dal süd es ün evenimaint chi tocca aint il chalender d'arrandschamaints ed attira sper blers indigens eir a blers giasts. La lingua principala a la festa es però amo adüna rumantsch ed ün pa-talian.



Ils botschs han attrat impustüt famiglias cun uffants.

FOTOS BENEDICT STECHER



La piazza a Zernez es predestinada per ün tal arrandschamaint.